

西


藏

奏

疏

附西藏碑文
張由航題





西藏奏疏 卷四

查辦乍了夷務

道光二十年十月二十三日奏爲特參委辦乍了夷務自行轉回之番目等請

旨先行摘革頂翎名號並咨商四川總督派員會同查辦各緣由恭摺具

奏仰祈

聖鑒事竊查乍了地方向來不歸唐古特所屬一切事務均係該處大二兩呼圖克圖掌管所有應放頭目及倉儲巴等均係該呼圖克圖自行補放

前於道光十五年間該處兩呼圖克圖因派充頭人起見彼此不睦以致所屬人等藉端滋鬧抗違大道差使經歷任駐藏大臣疊次委員查辦旋結旋翻嗣於道光十九年復據前任察木多遊擊楊麟轉據乍了守備稟報乍了二呼圖克圖屬下之倉儲巴白瑪奚等調集番衆與大呼圖克圖人等打仗滋事搶劫牛馬所有餉銀等項往來差使以致烏拉不齊不能尅期前進以及附從愚番藉勢威脅塘兵估折文件實屬目無法紀復行稟請查辦前來當經前任駐藏

大臣關聖保臣孟保一面咨商四川督臣派委

巴塘糧務吳文嘉千總買大倫趕赴乍丫會同

臣等所派之署察木多糧務劉光第遊擊姜熙

儒並噶勒丹錫喀圖薩瑪第巴克什派委之噶

布倫丹珍策旺達爾罕堪布羅桑稱勒朗結等

詳慎妥辦去後隨據該委員等稟以夷性刁悍

卽時難於開導惟有酌量輕重設法剖斷等情

並經四川督臣及臣等屢札嚴催迅辦在案臣

海樸前次道經該處面諭委員等妥速辦理毋

稍觀望有延時日暨因巴塘察木多兩台地方

緊要尙有應辦事件旋將巴塘糧務吳文嘉察
木多遊擊姜熙儒撤回本任酌留糧務劉光第
千總賈大倫督同噶布倫丹珍策旺等勒限在
彼迅辦不准任意稽延茲於本年十月十四日
接據該噶布倫來稟內稱乍了兩呼圖克圖各
執已見不遵勸諭現在二呼圖克圖屬下之倉
儲巴白瑪奚等各調番衆對敵打仗小的噶布
倫等不敢在彼任紮只得轉回等情臣等伏思
該呼圖克圖以派充頭人細故彼此不睦原屬
蠻觸相爭僅可置之不問乃自道光十五年以

至於今互相爭鬧雖經委員查辦無如該大呼
圖克圖因有印信號紙於該處一切事務不肯
分勢於人而二呼圖克圖勢衆力強又不受其
挾制兼之倉儲巴白瑪奚等從中挑唆是非兩
相結怨旣深以致日久莫結惟查乍了阿足王
卡各塘汎地方爲川省差使往來通衢設於摺
報餉項事件稍有疎虞所關匪細今該委員等
辦理復經年餘竟未辦有端倪臣等現將糧務
劉光第千總買大倫一併撤回本任並一面札
調素悉夷情之備弁前赴乍了並飛咨四川總

督揀派裡塘糧務王春源調赴乍丫設法駕馭以期迅速完結綏靜邊圉惟查噶布倫丹珍策旺等係二品番目辦事之人何得稟報兩呼圖克圖聚集番衆打仗並不等候批示胆敢私行轉回實屬有乖體制其達爾罕堪布羅桑稱勒朗結一併隨同該噶布倫轉回亦屬不合並據噶勒丹錫呼圖薩瑪第巴克什咨商擬辦前來相應請

旨將噶布倫丹珍策旺頂戴花翎先行摘去並將羅桑稱勒朗結之達爾罕堪布名號一併革去仍令

帶過前往會同裡塘糧務等迅辦完結如果奮
勉_臣等再行籲懇

天恩給予開復倘敢仍前疲玩卽行請

旨嚴加治罪一摺于道光二十年十一月二十六日內

閣奉

上諭孟保等奏請將委辦夷務自行轉回之噶布倫達
爾罕堪布等摘革頂翎名號一摺噶布倫丹珍策旺
等係二品番目辦事之人稟報兩呼圖克圖滋事並
不等候批示輒卽私行轉回實屬有乖體制其達爾
罕堪布羅桑稱勒朗結隨同該噶布倫轉回亦有不

合所有噶布倫丹珍策旺頂戴花翎著先行摘去羅
桑稱勒朗結之達爾罕堪布名號亦著一併革去仍
令帶過會同裡塘糧務等迅辦完結由該大臣查明
是否奮勉抑仍疲玩分別請旨辦理該衙門知道欽
此

陳書自道光二十三年正月十九日臣寶興孟保海樸

跪

奏為委員查辦乍了夷務完竣道路疏通恭摺會

奏仰祈

聖鑒事竊

臣

孟保海樸前因乍了呼圖克圖互相爭競

會摺

奏奉

諭旨該呼圖克圖等蠻觸相爭固可置之不理惟乍了

阿足王卡一帶地方為前藏通衢未可令其阻梗孟

保等派員前往開導僅止會同糧員恐不足以資彈

壓著寶興卽委幹員馳往妥協辦理等因欽此

臣寶

興遵卽

奏委保寧府知府瑞光馳往會督前委之定日汎

守備謝國泰裡塘糧務王椿源妥善查辦復又

節次檄催去後茲據該委員等馳赴該處調集

兩造詳細查訊該處窮荒野地頑獷成風設有

呼圖克圖管理地方事務曾於康熙五十八年

給有講習黃法那門漢印信乾隆二十四年復

奉頒給

勅書白頭輩呼圖克圖轉至現在之大呼圖克圖圖布

丹濟墨吹濟加木叅已經六世其徒洛桑丹臻
江錯亦轉世五輩與大呼圖克圖世爲師徒幫
辦一切事務該處僧俗人等隨稱爲二呼圖克
圖相沿已久遇有意見不和時相爭競歷未官
爲查辦前自五輩呼圖克圖圓寂後卽係洛桑
丹臻江錯一人管事及大呼圖克圖轉世於道
光十三年自藏學經轉回接管見番目驕縱急
圖整頓然亦用人失當操之太促以致屬番疑
懼旋因爭放頭人彼此不睦良番或被脅打仗
川藏往來差使至彼間有阻滯此該呼圖克圖

等爭競之原委也前經委員節次設法排解總未貼服嗣經該委員王椿源謝國泰深入番寨剴切開導復親赴各寨落向被脅番民逐爲撫馭遍貼告示令各照常耕牧毋得聽糾滋事衆隨安靜而該呼圖克圖等尙爭執不已迨該府瑞光馳抵該處會督謝國泰等集案查訊因該處事務本係大呼圖克圖專管令洛桑丹臻江錯此後毋庸再行幫同管理洛桑丹臻江錯等亦仍不遵斷復經該委員等連日多方勸導始各出具愿仍各敦和睦不敢再行打仗滋事遇



有差使催令屬番各出烏拉聽候雇用甘結由該委員等稟送前來臣等查該處距川省二千九百餘里一切情形與內地不同其蠻觸相爭事所常有從未官爲過問此次該呼圖克圖等爭競因差使間有阻滯始行委員查辦如果該處番衆等於往來差使照常應付大道不致梗塞自可毋庸別事推求况大呼圖克圖奉有

勅印辦事管番是其專責而洛桑丹臻江錯與大呼圖克圖世爲師徒幫辦事務已非一世今若爲之更張斷令不准其辦事恐致激釀衅端且已俱

出仍敦和睦不復滋事甘結備案現在該處遇
有一切來往差使所需烏拉均係隨到應雇並
無阻梗稽滯自應即行就案完結以免別生枝
節臣等往返咨商意見相同除檄飭遵照外所
有委員查辦乍了夷務完竣道路疏通緣由謹
合詞恭摺具

奏伏乞

皇上聖鑒訓示謹

奏等因於道光二十三年正月十九日具

奏於是年二月二十六日奉到

硃批依議欽此